

1 PITA

Pita so mamey peyr- ar ko hok non

Meyamey uwr hokwe: Aposel Pita.

Yier hiy ma lwayr meyamey hokwe: Hiykwe yier Rom mon se po meyamey pak e, nonkway lwak popriy pey.

Enekwei hiy ma meyamey hokwe: Hiykwe enekwei Yia 63 sok po meyamey pak e, Yia 64 sok po meyamey pak e, Jisas hiy ma lokrue so meyki.

Ok mamey mon ma lwak mokwe senkin: Aposel Pita hiykwe mamey okukwe hyo lokrue enekwei ohri-ar sok meyamey kow, kristen-uwrso Juda ko, kipay Esia mon ma lwayr me hiy-mon woro-woro kraipakrai e. Hiykwe senkin me, aw nak-ok ey mokwe, mo kristen mo liwak yor ko kopi kamon. Seyr lwayr peyow ey hokwe, God hiykwe unsaney hye ma nan kiykiy-ay me papo kekie kow koruay. Mamey mon kokwe, Pita hiykwe senkin me, enekwei enkin hrom uwrso Hakamay se ma nan kiykiy-ay omokwe, uwrso God hiy ma lahan iaup hom non. Hiykwe sehe meyamey, sa hom sios se lokriy hain ame, sa hmo Juda mo yor arian me ma-ley mon nakyas ame.

Mamey 1 Pita ko uron ipey-ar hokwe senkin: Kristen, enekwei aposel hom ma lwayr non ma lwak homkwe mo aw nak-ok hain. Hmo har homkwe hmo nan kiykiy-ay me hokuaw lokrue-sa-okrue. Sawk mamey okukwe Pita hiykwe kristen me senkin mahiy-me kraipakrai, “Mo kristen hom ki erey aw aiopey hay nak-ok hi, God hiykwe hyo lwayr peyow uron hokwe liy lorionay ley, sawk hmo pie mokwe nonkumey mon papo kekie kow koruay. Sohyy so hokuaw kokwe homkwe kwa lorok kraipakrai.”

1 ¹Hakwe Pita, Jisas Kraiss so aposel hiy non.

Mamey okukwe, hakwe uwrso, God hiy ma lahan iaup, yier har meiw mon ma lwayr nonwor onwor nok seme mey kow ha. Yier senkin senkin, kipay Pontus, Galesia, Kapadosia, Esia, Bitinia serey mon ma lwak sohom. ²Hme kokwe, Aio God so nonkway peyrmaw ko so kueir me-iaup pie. Sa God so Niohney hiykwe hme kokwe uwrso pekney-weys seme mon wak, hom Jisas Kraiss so ok me lonuayk me e. Seyr hme hyo nioh arian non hawr mnow-mnow kow ihyy e.

Maym kow yor o, seyr liwak marowhway yor o, hmo mon ka nuw-wak prupru-sow.^a

Hromo uron God se hyohyo ma lon hokwe, su lwayr

³Hromkwe hromo God, hiy hromo Hakamay Jisas Kraiss so Aio ma lwak se nak-me-ihye e. Hyo uron lowk yor ipey-ar ma lwak ke hokuaw kokwe, hiykwe hreme kokwe ney iwon-ar po mon wak, Jisas Kraiss se lokrue ko se ma-me-sian so kueur nonaw. God hiy hreme senkin ma lon se hokuaw, hromo uron God se hyohyo ma lon hokwe, su lwayr. ⁴ Seyr hromkwe omeme ihye-ar, God hiy hreme kow e ma me-loray me lonokyaw ey se naruok ira. Omeme somokwe, liy lira por ha ley, seyr liy preir kawk ley, seyr liy mon sopruw kreik ley, sawk nonkumey mon po kekie sowkriy kow naruok.^b ⁵ Hom God se ma nan kiykiy-ay so kueur nonaw, hme kokwe God so krai ipey-ar hok hiy-orok eym wayr, senkinaw-aw, God hiy huonok prosue mey ke enekwei pariawey-ar sok mon ousne hrahra ha sehe.^c

⁶ Homkwe God so huonok prosue mey sokwe kar kwa nakey e, mo enekwei haraw-aw low senkin senkin hom hme mon eykawn sese yay hi, seyr hmo uron me mon owk kworpakwor hi.^d ⁷ Leykawn somokwe seme lousne, hmo nan kiykiy-ay yor hok yaprue ma lwak ke mesair kow e. Mo gol seyn, mo omok lira por ha hi, ya non loum mnow-mnow ir. Suw liy-liy-aw, hmo nan kiykiy-ay yor, gol mo eir mon ma lwak sokukwe liy-liy-aw mon ir, hok yaprue lorok kraiy wayr e. Sa hmo nan kiykiy-ay yor yaprue senkin-aw nuw-wak ankin, homkwe enekwei pariawey-ar Jisas Kraiss hiy ma-lousne sok, me-ihye ok o, panpaniowni o, uru ayaw-ar o, seme lonokyaw ey.^e ⁸ Mo hom hye lira lopa lwak liok, homkwe hye uron-pi ko-ar nuw-wak. Mo hom pokon hye ma lira lopa hi, homkwe hye nan kiykiy-ay. Sa kar ley yor hmo uron mon woki ma nuw-wak prusow kokwe, aiopey hay, seyr panpaniowni non, seyr uwrsa mo wouk-ok non liy mesor popriy ley.^f ⁹ Payhokuaw, homkwe hmo nan kiykiy-ay yor mo meyk se lonok ey, suw hmo wa me ma huonokyaw prosue hom non.

¹⁰ Profet paraw-uh ko, God so maym hromo mon lousne ey ke ma mesor homkwe, God so me-huonok prosue mey ke yaprue nanpanan mon-sorasor popriy, seyr mey sohok ko meykwar ke nonkway e yaprue nonaw nuw-pawk hor-say hor-say lokruok.^g ¹¹ Homkwe God so mey hok enekwei pohiy sok lousne ey o, seyr yerki penkin non meio lowpway ey o, seme me-memeir lokruok. Kraiss so Niohney, profet me ma wanohyay hiykwe profet mo nonkway me hiy-anok-anok, hiy Kraiss so aw nak-ok enekwei o, seyr panpaniowni hyo mon lousne ey o, seme mesor koruay menkin.^h

^a 1:2 Ro 8:29; 2 Te 2:13 ^b 1:4 Kol 1:12 ^c 1:5 Jon 10:28; 17:11 ^d 1:6 Je 1:2; 1 Pi 5:10

^e 1:7 Sek 13:9; Mal 3:3; Je 1:3 ^f 1:8 Jon 20:29; 2 Ko 5:7 ^g 1:10 Mat 13:16-17 ^h 1:11 Sng 22; Ais 53; Luk 24:26-27

¹²God hiykwē profet seme senkin mesair sanion sow kow, profet-ok hom ma mesor somokwe, hme nian hiy-mon ey korey, sawk uwr̄sa hmo meyki ma lousne, hrom uwr̄sa enekwei enkin ma kiy-wayr eme hiymon popriy ey. Ok, paraw profet hom ma lohruw-a mokwe, Hakamay so okihey, uwr har, Niohney Pekney-weys, nonkumey ko se ma me-ha so kueir nonaw hme ompeys ma kiy-ohruw-a kow ko liy-liy-aw non-wak. Mo ensel nonkumey ko seyn, ok seme lira nonkway e mon.

Pekney-weys-aw lwak e

¹³Sohiy so hokuaw kokwe, hmo mawkworom hom mey meio ey me kwa lonhan onhan koruay. Seyr homkwe homkiaw-ayay-aw yaprue kwa hiy-anok anok. Seyr homkwe God so maym, omok Jisas Krai hiy lousne hrahra ha non, hme kow ey ke uron hyohyo kwa lon prusow. ¹⁴Seyr God so ok ke-aw kwa lonuayk me, seyr homkwe lira way yor piap-araw, paraw hom Hakamay se ma lawk-lawk non ma mon nakyas, hom hmo liwak yor me hiy-anok anok e ipan peie lon o.ⁱ ¹⁵Sawk hom mey penkin me meio e, homkwe pekneyweys-aw kwa lwak, God, hme ma me-huonok hiy pekneyweys ma lwak senkin. ¹⁶Payhokuaw, God so mamey hokwe senkin me, “Pekneyweys-aw lwak e, payhokuaw, hakwe pekneyweys.”

Wkp 11:44-45; 19:2; 20:7

¹⁷Enekwei hwon God se mesopok ankin, hunkwe hyekwe Aio-ok me. Hiykwē lira mesor anon uwr; unsaney hom weynpaweyn penkin meio e, hiykwē meir liy-liy-aw nonaw mesor anon-anon. Sei, enekwei haraw hom ki mon ma kiy-wayr ohokwe, homkwe God se kokwe hok nonaw kwa nak-nan ihey wayr.^j ¹⁸Payhokuaw, homkwe nonkway, hmekwe God hiykwē, liwak yor, ayay ma leip lopa, hmo iwey-om me ma kow mokwe, omeme omok sopruw kaw ey, gol, silva-ok ma me non nakway hrsays preisia hrahra ha pa, ¹⁹sawk Krai so nioh ihey-ar non nakway hrsays preisia hrahra ha. Hiykwē sipsip-ney ihey-arar, seyr hiykwē peik o, orki o, sohom lopa.^k ²⁰Hye kokwe paraw po me-iaup koruay, ki ehe monhre lopa non. Sawk hme hokuaw kokwe, hye kokwe enekwei pariawey-ar ohiy sok po mon ousne hrahra ha.^l ²¹Krai so kueir hokwe homkwe God, Jisas se lokrue ko se ma me-sian, seyr hye panpaniowni ma kow se nan kiykiy-ay. Hmo nan kiykiy-ay yor o, hmo uron hye hyohyo ma lon sohom o, God se-aw nyay-nyay.^m

²²Homkwe homkiaw-ayay po mon mnaw-mnow ihey, okar-ok ke ma lonuayk me so kueir nonaw. Sa homkwe hmo wayh-wayh me okar yor nonaw, uron-pi ko-ar seme lwak. Sohiy so hokuaw kokwe, homkwe wayh-wayh me uron-pi ko-ar uron lowpwarowp non seme nuw-wak prusow e.ⁿ

ⁱ 1:14 Ro 12:2; Ef 2:3; 4:17-18 ^j 1:17 Ro 2:11; MHO 2:23 ^k 1:19 Ap 20:28; Hi 9:12-14

^l 1:20 Ef 1:4 ^m 1:21 Jon 14:6; Ro 5:1-2 ⁿ 1:22 Jon 13:34; Ro 12:10

²³Payhokuaw, God so ok su ma lwayr, seyr ma lorok wayr-wayr ko kueir nonaw kokwe, homkwe ney iwon me hieyn po ma-sahre ousne sa-ousne. Hmekwe nioh lira por ha ey non mon ousne sa-ousne pa, sawk nioh lira por ha ey lopa non mon ousne sa-ousne. ²⁴God so mamey porih hokwe senkin me,

“Iwar lowpwarowp homkwe pan me hieyn, seyr hmo panpaniowni lowpwarowp mokwe pan sapa ko mo hon me hieyn. Pan hom hro kawk ankin, hon hom makuayk sakuayk ok.

²⁵Sawk Hakamay so ok kokwe senkin-aw lwayr peyow peyow.”
Ok sokukwe God so ok-ihay hme ma mesor kow hok non. *Ais 40:6-8*

Jisas hiykwe su lwayr mein

2 ¹Sei, homkwe yor piap-araw poya-poya hmo uron ko senkin me seme mon-say lowpway e: okrei-ok o, woki seys non lohruw-a yor o, lira way ompeys-mapeys yor o, har mo uru me me-piapmapiap yor o.^o ²Enkin homkwe ney iwon ma liwak pie me hieyn kwa lwak. Sa homkwe niohney so mu-hi ihey-ar se lowswa e kwa krah. Hom leyr ey mokwe kwa lowswa, sa hme ka huonokyaw prosue. ³God so mamey porih hokwe mo senkin me, “Homkwe homkiaw-aw po meio hrekawk ir, Hakamay so non-wawwaw yor mokwe wonor nuw-wak.”^p

⁴Hakamay, su lwayr mein so owh mon kwa le. Hye kokwe uwrso homkwe po lira muar, sawk God hiykwe hye kokwe, mon mein-owon aiopey hay non ma nakway se hieyn po lahan iaup. ⁵Homkwe seyr su lwayr mein me hieyn. Enkin ohokwe hme kokwe God hiykwe po kiy-yay sowkriy meio, hyo a pekney-weys niohney so se meio ie e. Serey mon kokwe homkwe pris pekney-weys me hieyn meio ey, seyr God se kokwe omeme ihey-ar niohney ko, hiy yaprue ma nan me leynow prawk kow ey, Jisas Krai so mey ko kueir nonaw.^q ⁶Payhokuaw, God so mamey hokwe senkin po mey,

“Hakwe mein ihey-ar, a meio ey se po lahan iaup, seyr hakwe mein ihey-ar sohokwe mnuw Saion mon po way yay koruay. Sohokwe mein-pow ipey-ar, a se nekie kraipakrai iarok ey. Uwrso, mein sehe posokwaw nan-panan kiykiy-ay e, homkwe owh-mar liy lon ley.” *Ais 28:16*

⁷Hom uwrso, Hakamay se ma nanpanan kiykiy-ay me kokwe, mein sohokwe mein-owon aiopey hay non ma nakway se hieyn. Sawk uwrso hye ma nanpanan kiykiy-ay lopa me kokwe mamey porih hokwe senkin me,

“Mein, a meio-uwr hom ma me-puar sohokwe, mein ipey-ar po mon ousne, a se hiymon kraipakrai ey hiy non.” *Sng 118:22*

^o 2:1 Ef 4:22; Je 1:21 ^p 2:3 Sng 34:8 ^q 2:5 Ef 2:21-22; MHO 1:6

⁸Seyr ok kamon God so mamey mon kokwe senkin me,
 “Mein sohokwe uwr sa me mon our sayah-ayah ey. Hiykwe peir,
 uwr sa me mon makuayk-sakuayk ey.”

Uwr sa homkwe seme lour sayah-ayah, payhokuaw, homkwe God so ok
 me lonuayk me pa, paraw God hiy hme ma nanpanan sakon kaw kow
 senkin. *Ais 8:14-15*

⁹Sawk homkwe uwr sa, God hiy ma lahan iaup hom non, seyr King so
 pris orhey non, seyr uwr sa pekneyweys, seyr God so uwr sa arian-ar. God
 hiykwe hme seme lahan iaup, hom God, hme eym-nawp ko me hyo ey-yar
 ihey-ar mon ma me-huonokyaw ousne-sa-ousne so mey ipey-ar me me-
 sanion sow kow e.^r ¹⁰Paraw kokwe homkwe God so uwr sa korey, sawk
 enekwei ohokwe homkwe God so uwr sa. Seyr paraw kokwe homkwe God
 so uron lowk yor kokwe lonok pa, sawk enekwei ohokwe homkwe God so
 uron lowk yor kokwe piap-onyok.^s

God so mey-uwr puraw lwak e

¹¹Hano wayh ihey-ar om, hakwe hmekwe hom ki erey uwr sa suwon
 me hieyn, seyr uwr sa yier meiaw mon ma lwayr nonwor onwor nok
 me hieyn, kiy-me-kraipakrai. Homkwe lira way yor piap-araw uron ko,
 hmo wa me aw ma lono me ipan peie lon kow o.^t ¹²Homkwe haiden mo
 ompok mon kokwe, yaprue kwa lwayr. Sa haiden hom hme yor piap mon
 me hieyn-aw lokin lor-a-lor ankin, uwr somokwe hmo mey yaprue me
 ma lira nonkway me hokuaw kokwe, God se panpaniowni kow lopa liy
 lwak ley, enekwei hiy uwr sa lowpwarowp me le ira mesor anon-anon
 non.^u

Makwey-uwr hromo ki se ma hiy-wayr mo ouon mon lwak e

¹³Hakamay so uru se hokuaw kokwe, homkwe peyrmawk liarok uwr,
 ki erey suko hiy-wayr krai non mo ouon mon kwa lwak. Peyr-ar kokwe,
 homkwe king, hiy-wayr krai ipey-ar non se kwa nanpanan ihey.^v ¹⁴Seyr
 gavman mo makwey-uwr, king hiy ma me-iaup o, uwr sa weynpaweyn
 piap-araw me ma mon me lomniy mamniy e, seyr uwr sa weynpaweyn
 yaprue me ma mon, mo uru me nakie e. ¹⁵God so uron ko ipey-ar hokwe
 senkin, homkwe weyn yaprue ihey-ar hom ma mon mo kueur nonaw,
 lawk-lawk-uwr mo ok, puraw ma lohruw-a me mon kueyn-yay e.^w
¹⁶Homkwe uwr sa, God hiy ma hrer-say preisias ha me hieyn kwa lano
 sayok. Sawk hme ma hrer-say preisias kow ha sokukwe, sa yor piap-araw
 mokwe, sohiy non peie nak-ian kre-a-kre mon sue o. Seyr homkwe God
 so mey-uwr sa me hieyn-aw kwa lwayr. ¹⁷Uwr sa lowpwarowp me yaprue

^r 2:9 Ais 9:2; Ef 5:8; Ta 2:14 ^s 2:10 Hos 2:23 ^t 2:11 Ga 5:17,24 ^u 2:12 Mat 5:16

^v 2:13 Ta 3:1 ^w 2:15 1 Pi 3:16

kwa nan ihey, seyr hmo kristen-wayh-wayh me kokwe uron-pi ko-ar kwa nak-wak, seyr God se kwa nak-hok, seyr king se yaprue kwa nan ihey.^x

Krais so owh aw ma nak-ok hokwe, kristen me meio mesair kow

¹⁸Mey-uwr puraw om, homkwe mon komnow komnow yor lowpwarowp non kokwe, hmo hakamay mo ouon mon kwa lwak, seyr hakamay yaprue, sosok-aw liwak marowhway yor non me-aw peie mon komnow komnow o, sawk hakamay, nays-ok ma me me seyn.^y ¹⁹Sa hwon God se ma nan se hokuaw, hno hakamay hiy hne puraw-puraw ma mon low-a-low se lorok kraiy ankin, hno yor sokukwe God hiykwe kar ley. ²⁰Sawk hno hakamay ki ko, hiy hwon yor piap me mon se hne lomniy, sa hwon nak-orok kraiy ankin, hai, God hiykwe hne yaprue liy lira o? Korey. Sawk hwon yor yaprue mon se hno hakamay hiy hne lomniy se hwon nak-orok kraiy ankin, suw God hiykwe hwon yaprue ma lorok se yaprue lira.^z ²¹Hme kokwe God hiykwe hom senkin lorok kraiy wayr e me-huonokyaw. Payhokuaw, Krais hiykiaw kokwe seyr hme hokuaw aw po nak-ok. Hyo yor mokwe owhnan ke hieyn, hme meio mesair kow hain, hom liy-liy-aw pyay e.^a

²²Hiykwe weyn piap-araw mon pa, seyr okrei-ok hyo woki mon lousne pa. Ais 53:9

²³Enekwei hye ma me-kawrpakawr hokwe, hiykwe uwrsa me ma-sahre me-kawrpakawr pa. Enekwei hiy aw ma nak-ok hokwe, hiykwe uwrsa me ma-sahre me hok-a-hok pa. Sawk hiykwe hiykiaw-ayay-aw, God uwrsa me yerki luw-luw-aw nonaw mesor anon-anon ey so iha mon kow.^b

²⁴Hromo yor piap-araw mokwe, Krais hiykiaw hyo owh arian non now hye nian nak-okin pror kawk okrue ey mon nakey. Hiykwe senkin sehe lon, hrom yor piap-araw me lokrue okriy hain e, sa yor luw-luw-aw me pyay e. Hmekwe, hyo owh so os-yop mo kueir nonaw po mon popriy.^c

²⁵Payhokuaw, paraw kokwe homkwe sipsip ma lanyan me hieyn, sawk enekwei ohokwe hme po ma-huonokyaw prosue, hom Sipsip-kowa-uwr, seyr hmo wa me Nakruok-uwr so meyki pyay e.^d

Uwr sa non, sa uwr non

3 ¹Sa uwr non om, homkwe yerki liy-liy-aw non kokwe, hmo uruh-nayh mo ouon mon-aw kwa lwak. Sa hmo uwr prueyn hiykwe, God so ok ke nan kiykiy-ay pa lwak ankin, hyekwe hyo sah ko yor yaprue ko kueir nonaw, seyr hok ok lohruw-a lopa liy ma-mon swahre prosue nan kiykiy-ay.^e ²Payhokuaw, uwr sohokwe hyo sah ko liwak yor orki lopa

^x 2:17 Ro 12:10 ^y 2:18 Ef 6:5 ^z 2:20 1 Pi 3:14,17 ^a 2:21 Mat 16:24; Jon 13:15

^b 2:23 Ais 53:7; 1 Pi 3:9 ^c 2:24 Ais 53:5-6; Ro 6:11 ^d 2:25 Ese 34:5-6; Jon 10:14

^e 3:1 Ef 5:22

o, hoko mon komnow komnow yor o, seme liy lira. ³Sa uwr non om, homkwe hmo owhi hom yaprue lira ey mokwe, omeme kumay ko non peie huwhay o. Yor senkin: makwey-ohne me ma ho-a-ho o, seyr omeme gol non ma meio me ma lie o, seyr owh ko omeme ihey-ar o.^f ⁴Sawk hmo wa hom yaprue penkin lwak e, somokwe hmo huwhay-ar ka lwak. Huwhay senkin, sosok-aw liwak yor o, kopowrie yor o. Huwhay sohom mo panpaniowni mokwe liy lira por ha ley, seyr God so nene mon kokwe omeme mein-owon aiopey hay non ma nakway me hieyn. ⁵Payhokuaw, sa pekney-weys paraw ma lwayr hain, God se-aw hyo-hyo ma lon mo yor homkiaw-ayay-aw ma huwhay mokwe senkin: homkwe hmo uruh-nayh arian mo ouon mon-aw lwak. ⁶Sara ko yor mokwe mo senkin lwak. Hokwe Abraham so ok ke lonuayk me, seyr hye kokwe hoko hakamay-ok me. Homkwe yor luw-luw-aw me meio ankin, seyr hok-yor lopa lwak ankin, suw hmekwe Sara ko ney-ok liy me.^g

⁷Uwr om, yerki liy-liy-aw non kokwe, hom hmo sa me nion ma non-wayr somokwe, hme yaprue kwa nanpanan popriy, seyr hme senkin kwa mon komnow komnow, sa mo kraik mokwe, hmo kraik mo ouon mon lwak. Payhokuaw, homkwe hmo sa me nion God so maym, su lwayr peyow ey ke non-onok ey. Senkin kwa lon, suw hmo God se mesopok yor ke liy mon sous-a-sous ley.^h

Yor luw-luw-aw me ma meio me aw ma nak-ok hom non

⁸Hano ok pariawey kokwe senkin: Hom lowpwarowp kokwe wayh-wayh me nion aymarowh-aw kwa non-wayr, seyr wayh-wayh mo low me kwa non-waw-waw way, seyr wayh-wayh me uron-pi ko-ar kwa lwak, seyr wayh-wayh me uron kwa lowk, seyr uwr sa uru lopa me hieyn kwa lanio.

⁹Homkwe yor piap-araw mokwe, yor piap-araw non peie ma-non-sawkriy o, seyr me-monmamon-yay-ok mokwe, me-monmamon-yay-ok non peie ma-non-sawkriy o, sawk homkwe God so hiymon yor ke kwa ma-sahre hiy-mesopok. Payhokuaw, God hiykwe hmekwe sehe me-huonokyaw, hom hyo hiy-mon yor ke lonok e. ¹⁰God so mamey porih hokwe mo senkin me, “Unsaney hyo liwak yor ki erey yaprue lwak e posokwaw nan e, seyr enekwei yaprue lira e posokwaw nan e, hiykwe ok-piap-ok peie me o, seyr okrei peie lokin lor-a-lor o.

¹¹Hiykwe yor piap me kankoum sow hain nok, yor yaprue me-aw kwa mon, seyr hiykwe lwak marowhway yor ke pawk nok, meyki kwa nak-pyay.

¹²Hakamay so nene mokwe, uwr luwluw-aw ma lwak me lira, seyr hmo mesopok me lonuayk. Sawk Hakamay hiykwe uwr sa yor piap-araw me ma mon mokwe me-puar.”

Sng 34:12-16

^f 3:3 1 Ti 2:9 ^g 3:6 Stt 18:12 ^h 3:7 Ef 5:25

¹³Hunkwe yor yaprue me meio e nan koukou-ay ankin, hne kokwe posokwaw mon piapay ley. ¹⁴Sawk mo hwon, weyn yaprue me ma mon me aw nak-ok hi, hunkwe God so uron ihey-ar so ouon mon lwak. Hunkwe yor, uwr sa senkin hom ma hok me peie hok o, seyr uron peie lowk kworpakwor kaw k o.ⁱ ¹⁵Sawk homkwe hmo uron mon kokwe Krai se hmo Hakamay kwa mon wak. Homkwe enekwei enekwei kwa naruok koruay, uwr sa, hyohyo-lon-yor hmo mon ma lwak se me-sorasor kow e ma mesopok me ma-sahre onuayk me ey se. Sawk homkwe sosok-aw yor o, mon komnow komnow yor o, sohom non kwa nak-meio. ¹⁶Hno nanpanan yor uron ko hokwe heyn lopa ka lwak. Suw uwr sa hno liwak yor, Krai so meyki ma pyay ha ke me-monmamon ankin, homkwe ok-piap-ok hom ma lohruw-a me ow-h-mar lon ey.^j ¹⁷Sa God so uron ko senkin lwak ankin, hwon yor yaprue meio se aw nak-ok e, sohokwe yaprue. Sawk hwon yor piap-araw meio se aw nak-ok ankin, sohokwe piap. ¹⁸Payhokuaw, Krai hiy weynpaweyn piap-araw me ma lokrue kow hokwe, hrousohrou naws prawk kow mey ke meio lowpway ey hokwe, hyo ow-hi arian ke enekwei kamon-awaw kow. Uwr luw-luw-aw hiykwe uwr luw-luw-aw ma lwak lopa me sehe lokrue kow, hme God so ow-h mon hiy-ey e. Hye kokwe ow-hi se ma me hokwe po mon okrue, sawk nihney se ma me hokwe su po mon wayr. ¹⁹Seyr hiykwe nihney non ley nok, nihney lowpwarowp kalabus mon ma lwak me God so ok me mesor kow. ²⁰Nihney somokwe, paraw God so ok me ma kamaun sow hom non, enekwei God hiy Noah se sip se ma me-meio non. God hiykwe hme kwe meinkiw-p-aw naruok wayr. Sawk uwr sa har-har-aw, iha sirom mu nareysyar pruw non mokwe hu so kueir nonaw huonokyaw prosue.^k ²¹Sa hu sohokwe, hu mon prouk yor, enekwei enkin hme ma huonokyaw prosue ke memeir. Suw orki ow-hi ko me hawr mnow-mnow pey, sawk hmo God se nanpanan yor uron ko yaprue non ma me-loray hok non. Hu mon prouk yor sokukwe, hme Jisas hiy lokrue ko se ma ma-loksian so kueir nonaw ma me-huonokyaw prosue hok non. ²²Krai hiykwe nonkumey mon po ma-ley, seyr God so iha sayar mon liwak, seyr ensel o, senkin senkin makwey-uwr o, senkin senkin krai o, hyo ouon mon lwak.

Hmo liwak yor mokwe God se-aw kow e

4 ¹Krai so ow-hi hok ki erey aw ma nak-ok se hokuaw kokwe, hwon seyn, hye hieyn liy-liy-aw kwa nanpanan orok kraiay. Payhokuaw, uwr, kristen ma lwak se hokuaw aw posokwaw nak-ok wayr e, hiykwe yor piap-araw me po lokriy hain.^l ²Sohiy so hokuaw kokwe, uwr senkin so enekwei, ki erey ma lwayr hokwe, hiykwe iwar mo lira way yor piap-araw me-aw seyn mon wayr pey, sawk hiykwe God so uron ko me pyay

ⁱ 3:14 Ais 8:12-13 ^j 3:16 1 Pi 2:12 ^k 3:20 Stt 6:1-7:24 ^l 4:1 Ro 6:2,7

wayr. ³Payhokuaw, homkwe paraw kokwe, enekwei kraiar weynpaweyn, haiden hom ma mon me po mon. Weynpaweyn senkin: owhi ke kar mon ey yor piap-araw o, lira way yor piap-araw o, hu piap-araw lowswa lawk-lawk yor o, suhway-aw swa-hokruw a yor, moryak moryak yor piap-araw non o, okrei-god me kampueys me-ihey yor piap-araw o.^m ⁴Enekwei ohokwe haiden homkwe hme lira preiryay, payhokuaw, homkwe haiden mo liwak yor, weywar me hieyn ma lwayr me non-pyay pey. Sa haiden homkwe hme ok-piap-ok seme me. ⁵Sawk omok kokwe God hiykwe haiden-uwrsa me me-sasay ey, hom hmo weynpaweyn penkin ma lwak me hye ma-mesor sanion sow kow e. God sohokwe, uwrsa su ma lwayr o, ma lokrue ha o, seme lira mesor anon-anon e ma naruok koruay hiy non.ⁿ ⁶Meyk, God so ok-ihey ke uwrsa, enekwei enkin inaw lwak lopa ma lwak me inaw lwak non ma mesor kow kokwe, mo sohiykwaw. Suw senkin, uwrsa somokwe, ki erey yor piap-araw non ma lwak mokwe, God hiykwe hom owhi non ma lwak me po lira mesor anon-anon, sawk uwrsa sohom nihney non ma lwak omokwe, homkwe su lwayr peyow peyow ey.

⁷Ki ohiy so weynpaweyn lowpwarowp mokwe, pau meio lowpway ohriar lwak. Sohiy so hokuaw kokwe, hmo mawkworom mokwe kumay seme lwak e, seyr homkwe homkiaw-ayay-aw seme nak-anok-anok e, hom God se mesopok ey hokwe.^o ⁸Yor lowpwarowp mo eir-ar mon kokwe homkwe wayh-wayh me uron-pi ko-ar kwa nuw-wak prusow. Payhokuaw, uron-pi ko-ar yor hokwe, weynpaweyn piap-araw poya-poya me swakuwmay sue.^p ⁹Hmo kristen-wayh me kwa me-huonokyaw yawriy, hohuaw yor lopa non.^q ¹⁰Uwrsa prueyn prueyn-aw, God hiy maym penkin ke kow e, homkwe uwrsa me hiymon e kwa meio, God so maym senkin-senkin me yaprue nakruok uwr se hieyn.^r ¹¹Uwr, God so ok me posokwaw mesor e, hiykwe God so ok-ar-ok me-aw kwa mesor. Uwr, uwrsa me posokwaw hiy-mon e, hiykwe krai, God hiy ma kow sohiy non-aw kwa meio. Sa mey lowpwarowp somokwe, God so uru se Jisas Krai so kueur nonaw nak-ie e hokuaw. Panpaniowni o, krai o, Jisas Krai so mon-aw ka lwak peyow peyow wayr-wayr. Ok-ar.

Kristen ma lwak se hokuaw, aw nak-ok ey

¹²Hano wayh ihey-ar om, homkwe leykawn ir, hme aw ma mon-ok me, yor suwon, hmo owh mon ma lousne me hieyn peie preiryay o. ¹³Sawk hom Krai, hiy aw ma nak-ok se ma non-wawwaw ok hokwe, homkwe kar kwa nakey hi. Sa Krai so panpaniowni hiy lousne hrahra ha enekwei hokwe, homkwe kar nuw-nakey prusow ey.^s ¹⁴Hme kokwe Krai so uru se hokuaw me-piap-ma-piap ankin, homkwe God so uron ihey-ar so

^m 4:3 Ef 2:2-3 ⁿ 4:5 Ap 10:42 ^o 4:7 Ro 13:11-12 ^p 4:8 1 Pi 1:22 ^q 4:9 Hi 13:2

^r 4:10 Ro 12:6-8 ^s 4:13 Ap 5:41; Je 1:2; 1 Pi 1:6-7

ouon mon lwak. Payhokuaw, Niohney panpaniowni non, God so Niohney hiykwe hmo mon lwak.^t ¹⁵Hwon unsaney lokin kwor, seyr yokun lopri, seyr powey-powey yor har me mon, seyr uwrusa har mo mey me lok-way-a-way, yor senkin me mon se, aw sehe nak-ok ankin, sohokwe piap. ¹⁶Sawk hunkwe kristen lwak se, aw sehe nak-ok ankin, hunkwe ow-h-mar peie lon o. Sawk hunkwe God se kwa me-ihay, payhokuaw, hunkwe uru kristen se nak-wayr.

¹⁷Enekwei God hiy uwrusa me lira mesor anon-anon ey hokwe pau ohriar lwak, sawk mey sokukwe God hiykwe hyo a arian mon meio ha pie ey. Sa God hiykwe hreme peyrmawk lira mesor anon-anon ankin, hai, uwrusa hyo ok-ihay ke ma nan kiykiy-ay lopa homkwe, penkin nuw-on ey mo? ¹⁸God so mamey porih hokwe mo senkin me,

“Uwrusa luw-luw-aw me huonokyaw prosue yerki hokwe honon-honon lwak ankin, hai, uwrusa God se ma nanpanan lopa o, uwrusa yor piap me ma mon o, homkwe penkin nuw-on ey mo?” *Snd 11:31*

¹⁹Suw senkin, uwrusa aw ma nak-ok, God so uron ko se hokuaw, homkwe homkiaw-ayay hmo Monhre-uwr hme ma hiymon kraipakrai wayr se-aw kwa kow, seyr yor yaprue me mon nonaw kwa lwak.

God so sipsip orhey non

5 ¹Hakwe sios-makwey-uwr, hme nion ma non-wak me, sios-makwey-uwr-wayh se hieyn ok kamon kiy-me. Seyr hakwe Krai hiy aw ma nak-ok se po lorok ira, seyr Krai so panpaniowni omok lousne hrahra ha ey hokwe, hakwe ya non-wawwaw onok a. Hakwe hme senkin lonsey, ²homkwe God so sipsip orhey non, hmo iha mon ma kow sohom mo naykih kwa lwak. Seyr homkwe hme ma me-sasay me peie meio, sawk kar ley yor nonaw kwa nak-meio, God hiy ma nan senkin. Homkwe mein-owon kraiar me peie nan koukou-ay o, sawk hmo uron mokwe, uwrusa me hiymon e kwa nan kraiy.^u ³Homkwe uwrusa, hmo iha mon ma kow me, uwr seirpey se hieyn peie me-sasay meio o, sawk hmo yor mokwe, uwrusa sohom mo owhnan yaprue me hieyn kwa lwak.^v ⁴Sawk Sipsip kowa-uwr mo Makwey-uwr hiy lousne ankin, homkwe king so makwey-kokway panpaniowni non me lonokyaw ey. Panpaniowni sohokwe liy lira por ha ley.

⁵Seyr liy-liy-aw, uwr warkiayr homkwe uwr hakamay mo ouon mon kwa lwak. Hom lowpwarowp kokwe, uwr uru lopa me hieyn hmo wayh-wayh me kwa hiymon. Payhokuaw, God so mamey porih hokwe mo senkin me,

“God hiykwe uwrusa ma aryar mokwe, me-puar. Sawk hyo maym mokwe, uwrusa uru lopa me hieyn ma lanio me kow.”^w

^t 4:14 1 Pi 2:20 ^u 5:2 Jon 21:15-17; Ap 20:28 ^v 5:3 2 Ko 1:24; Fl 3:17; Ta 2:7 ^w 5:5 Snd 3:34

⁶Homkwe uwrsa, uru lopa me hieyn, God so iha seirpey-ar ko ouon mon kwa lwak, God hiy hme omok lowk nakie ey hokwe, enekwei yaprue God hiykiaw ma nan sok.^x ⁷Hom pay me lowk kworpakwor kaw e, hye nianaw kwa mekow, payhokuaw, hiykwe hme hiy-mon wayr.^y

⁸Homkwe homkiaw-ayay kwa lanok anok, seyr iray-iray nonaw kwa lwak. Hmo awia-pow hiykwe laion se hieyn inakok lawor-yay saw anio ira, uwr hiy lokwan-kwor ei-a ey se.^z ⁹Homkwe hmo nan kiykiy-ay yor mon-aw kwa lorok kraiyay, seyr Satan se kwa me-puar ono huon. Payhokuaw, homkwe nonkway, hmo kristen-wayh, kipay lowpwarowp ko homkwe low hom ma lway senkin liy-liy-aw lway.^a

¹⁰Sawk enekwei haraw hom low ma lway so meyki hokwe, maym lowpwarowp mo God, hom Krai se nion ma non-okin nasay se hokuaw, hme hyo lwayr peyow panpaniowni se lonok e ma me-huonokyaw hiykwe, hme mon ihey ey, seyr hme krai o, lorok kraiyay yor o, wei-a-wei yor lopa o, seme kow ey. ¹¹Krai lowpwarowp mokwe hyo mon-aw ka lwak peyow peyow. Okar.

Me-ihey-ok pariawey-ar

¹²Mamey haraw-ney okukwe, hanekwe Sailas hiy hiy-mey. Hakwe hye kokwe, kristen-wayh hane nion ma non-orok kraipakrai wayr se hieyn lira. Hakwe hme seme mey kow ha, hme me-kraipakrai e, seyr hme senkin me-kumay kow e, ok okukwe God so maym okar-ar hok non. Homkwe serey mon-aw kwa lorok kraipakrai.^b

¹³Sios-uwrsa, Babilon ko^c God hiy hme nion ma lahan iaup homkwe, hmo me-ihey-ok mokwe hme mekow ha. Hano ney Mak seyn, liy-liy-aw mekow ha.^d ¹⁴Homkwe hmo kristen-wayh me me-ihey-ok me ankin, homkwe uron-pi ko-ar yor nonaw kwa way neyr-a-neyr.

Liwak-marowhway yor kokwe hom lowpwarowp Krai so mon ma lwak me nion ka non-wak.

^x 5:6 Mat 23:12; Luk 14:11; Je 4:10 ^y 5:7 Mat 6:25-30 ^z 5:8 1 Te 5:6 ^a 5:9 Ef 6:11-13; Je 4:7 ^b 5:12 Ap 12:2,25; 15:22,37-40 ^c 5:13 Uru sohokwe Mesair Hrahra ha Ok ko Mamey mon nak-wak, sa nonkway-uwr homkwe senkin nan, yier Rom se memeir. ^d 5:13 2 Ti 4:11